



Butter mit Luther

Herr Pastor, en Moment nur, bliewe se äwe moa stoa
Et es woahr, ech ha wernich Zitt e de Kirche ze goa
Am Sonnich es et emmer ze fröh, sonnoavends emmer ze spä
Da well ech mech lewer no moa ob de anner Sidde dräh

Awer wie ech em Bedde so brötschte ganz ohne Maniern
Doa koam ech wahne et Prakeziern
Du kast sonnoavends net nur fiern on sonnichmorjens röm gruffe
Wenn dusse vor de Dürn all Glöckelcher lürn

On de Lü goa zom Bäre on lustern ob Gottes Wort
Nur du ahl Fulch blibst emmer nur fort
Et es woahr, va dr Kirche woll ech net emmer veel wesse
Ha ech bim leewe Gott itz ussgesch...peelt

Njoa, ech sin alt e moa en Olit on mänchmoa net goot
Awer sä se ganz ehrlich: On dm Heiland sin Blood
Hät dä dat am Krüze net och for mech verschott
Dobet ech Freere hädde bim lewe Gott

Ech mein, ech ha itz genooch geschwatt
Herr Pastor, sä se selver och e moa wat
Schwätze se net drömröm, Gä se Botter bi de Fösch
Därf en Karle wie ech a dm Heiland sin Dösch

"Nun denn, mein Sohn, hier ist zum Fisch die Butter
Ich sage es dir trefflich mit Doktor Martin Luther
Wenn du glaubst und vertraust, bist du gerecht und Sünder zugleich
Simul iustus et peccator, so wächst Gottes Reich"

Ech mos sä, Herr Pastor, dat klenzt wahne gescheut
Nur sä se moa genau, wat dat for mech bedeut.
Wat sall dat da heisse, Sönnner on gerecht zegleich
Min Frau sät, dr Deuvel brotzelt dech wenelweich

Ech well gern bäre, awer ech ha och alt e moa Durscht
Ob Biercher us Krommich bet nem Krengel Fleischwurscht
Ech bezahl och emmer min Kirchestüern
Kön dr leewe Gott dat da net och ästemiern

Ech wel gern e dr Hemmel, on net min Sön römschleppe
Nur wel ech och net goa noa de Knützjesköppe
Et schint mer, doa sin veel so wahne verklemmt
Dat net e moa en Papst or en Pastor e dr Hemmel kömmt

Die schwätze emmer vam Höllfuer on va dr Bekehrung
Bi den es och dr frömmste Ma nur ob Bewährung
On mänch einer moalt dr Deuvel so aggurat a de Wand
Dat mr mein könn, hä wör bet dem bekannt or zesame
Awer veelichts hät dä doaheim och nur en börs Schwijermamme

Ech well net schwemme bi dr Taufe on ech luster net gern
Wenn sech emes selver gern schwätze hört va Gott dm Herrn
Nä, so en Geläll ersparn ech mr da
On klobbe, so wi ech sin, a dr Hemmelsdür a

Wenn dr Petrus da broddelt, dem Karle sä ech
Drej moa krähte dr Gückel, on itz goa us dem Wech
Ech glauwe on vertraue! Dat scheckt for dm Herrgott sin Reich
Ech do min Bestes loa onne on sin dorwe iustus zegleich

Noada, Herr Pastor, bes en aner moa
Veelichts alt am Sonnich, söll ech e de Kirche goa
Da lustern ech, wat se sä, on wesse se wat
Schwätze se gern Latein, awer veel leewer noch Platt